

Vale ta lansa CD/DVD 'Pita Bo Auto Prome Bo Yega Cas'

ORANJESTAD – Ayera 15 di november ta e fecha cu e comico di Aruba, Vale Croes a scohe pa lansa un DVD/CD riba mercado. Esaki ta e mas reciente produccion di e asina auto-proclama 'E Arubiano Original' y mester bisa tambe, uno masha spera pa su fanaticada tanto na Aruba como e islanan ruman.

'Pita Bo Auto Prome Bo Yega Cas' ta un produccion cu tin chiste nobo-nobo, canto y baile insuperabel di Juan Gabriel. E ta obtenibel for di ayera atraves di e artista mes. Den transcurso di ayeraminta por a scucha na e programa radial di Erin Croes na Magic FM un entrevista masha ameno cu Vale Croes mientras cu un poco mas lat e tabata tambe den esun di Ruben Garcia.

Durante dia di ayera Vale Croes a haci un regalo special na e prome cumpradonan di e DVD/CD y tambe tabatin oportunidad pa esaki wordo firma. Algo cu e comico a pone hopi enfasis riba dje y den un tono fuera di chasco ta e hecho cu e ta e unico persona bendiendo e DVD/CD te cu aworaki.

E ta haci un suplica pa no cumpra for di otro personanan ya cu lo bo ta cumprando un DVD/CD piratia y esaki di mes ta afecta e artista financieramente. E ta suplica cu e no por realisa e tipo di produccionnan mas y consecuentemente ta e publico mes ta bira victima. Tin ademas un servicio di entrega te na cas of 'delivery' cu ta obtenibel yamando 733-7644 of 736-6074.

Den proximo dianan Bon Dia Aruba lo publica mas detaye en cuanto e produccion fabuloso aki. Vale Croes ta probecha e oportunidad aki pa desea pueblo stima di Aruba un felis Pasco y un prospero año 2007 cu hopi bendicion di Dios Tata.

VALE IMPACT PRODUCTIONS TA PRESENTA

"PITA BO AUTO PROME BO YEGA CAS"

CU VALE CROES Y CUDOU.....!

E ARUBIANO ORIGINAL DVD/CD

VALUABLE-AUTHENTIC-LAUGHING-ENTERTAINMENT